

Date – 30/06/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Naktuk July ni 1 atanga hman ãan tura sawrkar laipuiin Dan thar a siamah hmeichhe laka pawikhawihthu hremna chu mipa chungah chauh ni tawh loin hmeichhe chungah pawh lek kawh theih a ni tawh dawn.
2. Governor Dr. Hari Babu Kambhampati-a'n Mizoram Peace Accord chu Remna Thuthlung hlawhtling tluantling tlêm te zing ami a ni, a ti.
3. Prime Minister Narendra Modi-a'n vawiin chawhma dar 11 khian Akashvani kal tlangin mipuite hnenah thuchah a sawi leh dawn.

<><><>

CRIMINAL LAWS

Naktuk July ni 1 atanga hman ãan tura sawrkar laipuiin dan thar a siam, New Criminal Laws of India 2023-ah Gender Neutral awm tharin hei hian hmeichhe laka pawikhawihthu hremna chu mipa chungah chauh ni tawh loin hmeichhe chungah pawh lek kawh theih turin dan a siam belh a ni.

Sawrkar laipui dan thar siam pathum zingah hian hmeichhe humhimna dan tha tak siam belhin Gender Neutral a rawn awm thar a, hei hian hmeichhe chungah pawikhawihthu hrem turah mipa chauh ni tawh loin hmeichhiate pawh hrem theihna Dan a dah thar a, intluktlang zawkin dan thar hnuaiyah hman a ni dawn.

Govt Mizoram Law College Asst Professor P. Lalremruati chuan Akashvani corr-in a kawmnaah Dan awm thar tur 3 chungchang hi sawiin, he dan thar hi mipuiten ngaihvena hriat ve a pawimawh, a ti a. Harsatna tawh hnuah chauh Dan ngaihven loin Dan thar chu mi zawng zawng huam tura a zau thei ang bera siam a nih avangin mipuiten hriat a pawimawh, a ti a. Mizo zinga Court-a case lut tam ber chu a tawp khawk chin chiah anih thin avangin a tira Dan hriat chu mipuite mawhphurhna anih angin harsatna tawh hnuah ni loin thil engemaw tih dawnah Dan hre mite zawh thin a pawimawh tih a sawi.

P. Lalremruati chuan dan tharah FIR thehluhin a thlen chin report chu Police ten ni 90 chhungin a thehluttu an hrilh ve a ngai tawh dawn, a ti a. Heng bakah hian dan hmasa lama phal thin Court remtihnaa Ukil te an case kalpui mek atanga an inhnudawh theihna chu tihtawp niin a tuartu hriatpuina tel loin an inhnukdawh thei tawh dawn lo, a ti a. Mimalin misual an lo manin a rang thei ang berin Police station hnai berah emaw police hnenah emaw hruai tur a ni tih dan awmsa chu darkar 6 chhunga hruai tur, tia thlak a ni, a ti a. Court-a thuhretua tangte humhimna dan, Witness Protection Scheme a awm tawh dawn, a ti bawk.

Asst Professor chuan dan tharah tunlai thiamna a hman theih tawh tur chuan Police hnuchhui kawngah leh case chin fel kawngah hmasawna tam tak a thlen dawn, a ti a. Dan hriat loh chu chhuanlam a tlin loh avangin mi tinten mahni himna tur dan ngaihven a pawimawh tih sawiin, khawtlang, zirna in leh Kohhranah thleng pawh inzirtirna neih a pawimawh thu a sawi bawk.

Sawrkar laipuiin dan thar naktuk atanga hman tan tura a duan 3 chungchang sawihona hi Akashvani chuan kar tin Inrinni tlai dar 4 atanga dar 4:30 inkarah a tichhuak thin a ni.

<><><>

GOVERNOR

Governor Dr Hari Babu Kambhampati-a'n Remna Ni chuan Remna leh muanna, inpumkhatna leh hmasawna kawnga ke pen duhna a tichiang, a ti a. Remna Thuthlung Ziah Ni hian India ram ropui tak chanchin ziahnaah hmun pawimawh a chang reng tawh a ni a ti.

Aijal Club-a Zirtawpni tlaia Remna Thuthlung Ziah hriatrengna hun leh lawmnaah thu sawiin Governor chuan, remna a awm theihna tur leh Mizoram tana hmalam hun êng zawk siam tura remna kawnga thawktu zawng zawngte chungah lawmthu a sawi a. Mizoram Peace Accord chu Mizoram tana beiseina êng leh midangte tan pawh khawnvar anga chiang taka hmuh theih beiseina êng leh entawn tur, Remna Thuthlung hlawhtling tluantling awm tlem te zing ami a ni, a ti.

Governor chuan Remna Thuthlung Ziah a nih theih nana theihtawp chhuahtu - Pu Laldenga, Mizo National Front (MNF) Founder President, Mizote tana hruaitu nih tling; Pu Lal Thanhawla, Chief Minister, Remna a awm theihna atana a lalthutthleng thawhsantu leh Pu Lalduhoma, Chief Minister ni lai, khatih hun laia MNF leh India sawrkar inkara palai hna pawimawh thawktute an ngaihsanawm tih a sawi a. Pu Zoramthanga, Pu Ch. Chhunga leh Brig. T. Sailo, Mizoram Chief Minister lo ni tawhte pawhin he Remna leh muanna hlu tak a lo awm theih nan an thawh hlawk hle bawk tih a sawi a ni.

Mizoram Peace Accord, 1986 hi India sawrkar leh Mizo National Front (MNF)-te kara Inremna Thuthlung, Mizorama helna, kum 1966 atanga intan tihtawpna a ni a. He Document hming hi Mizoram Accord, 1986 : Memorandum of Settlement tih niin, kum 1986 June ni 30 khan Pu Laldenga, MNF President, Pu RD Pradhan, Union Home Secretary leh Pu Lalkhama, Chief Secretary, Mizoram ten hming an ziah hnan a ni.

<><><>

DY SPEAKER

Assembly Dy. Speaker Pu Lalfamkima'n nimin khan NH-54/6 huam chhunga RTP Farm leh Sethawn inkar leh Kawnpui Quarry bula kawng siam mek a tlawh a, Contractor chu chak zawka hna thawk turin a hrih.

National Highway 54/6 huam chhung, Kolasib leh Kawnpui inkara RTP Farm leh Sethawn khaw inkar leh Kawnpui Quarry bula kawng chhe zual lai, ruah a sur changa lirthei tanna thin chu NHIDCL hnuaiah Contractor, Pu C. Lalhluna, Aizawl chuan a thawk mek a, helai hnathawktu Contractor hian nikum October thla khan Work Order hmuin hnathawh hun chung tura ruat thla 6 a zawh hnuaiah tunah hian hun pek belh a ni a, Estimate Amount hi Cheng vaibelchhe 3 a ni.

Kawng chhiaah hian lirthei vei vak a tangkhan loh nan leh hnathawh a buai loh nan chhun lamah Contractor-in traffic duty a ruahman a, zan lamah Kolasib Traffic Police leh Kawnpui Police an in-duty chhawk ang a, Thingdawl YMA-in an puibawm thin ang.

Assembly Dy Speaker Pu Lalfamkima chuan Mizoram sorkarin inkalpawhna kawngpui a ngaih pawimawh thu sawiin, Mizorama kawngpui pawimawh leh lun ber NH-54/6, Aizawl panna kawngah hun rei tak chung lirthei kal velah harsatna a awm thin chu pawl a tih thu sawiin, hna enkawltu NHIDCL leh an hnuai Contractor te chu mipuite mamawhna hriaa an hna uluk leh chak taka thawk tura chahin hun tiam chung a hna thawk zo ngei turin a chah baw.

Dy. Speaker hi Kolasib SP Pu David H. Lalthangliana; NHIDCL General Manager Pranab Sinha; Manager Shaksham Tayagi; PWD SDO Lianhmingthanga; Kolasib District MJA hruaitute; Contractor aiawh leh party hruaitu thenkhat in an tawiam.

<><><>

PC PARTY PR

Peoples Conference Party (PC) chuan sorkar kal ta leh tun sawrkar thar huang chungah Aizawl Central Jail leh District Jail hrang hrangah a khât tawka Jail tàng tlan chhuak an awm fo mai chu venhimna lama sawrkar inthlahdah vangah an ngai tih an sawi.

Nimina thuchhuah an siamah PC Party chuan tunhnaia Prison-Van atanga harsa lo taka drugs kaihnawihna tàng an tlan chhuah theihna chhan pawh venghimtute inthlahdah leh fimkhur tawh loh vang tih a chiang hle, an ti a.

Heng bàkah hian District Jail hrang hranga Prison-Van te hi hlui tawh, thawm that ngai te, a thar ngaihtuah ngai te a nih tawh laia ngaihsak a hlawh tawh loh avangin Jail tang ten tlan chhuahna remchangah an hman phah taah an ngai tih an sawi baw.

Hetianga awlai taka Jail-a tàngte an tlan chhuah theih fona chhan leh vang chiang taka chhui chhuak tur leh tun hnuah a thlen fo tawh loh nan theihtawp chhuaha tan la thar turin PC Party chuan Mizoram sawrkar an ngen tih an sawi.

<><><>

BAWNGKAWN - DURTLANG ROAD BLOCK

Aizawl Bawngkawn leh Durtlang inkar kawnga lei a min vangin helai kawngpui hi khar rih a ni.

Aizawl Deputy Commissioner & Disaster Management Authority, Aizawl kaihhruaiin nimin zing khan AMC, G&M, PWD leh Department hrang hrang atanga mithiamte'n lei minna hmun hi an enho a. Thil awm dan endik a nih lai hian lei tla-leh mai thei a la awm avangin chhiatna thleng palh a awm loh nan kawng an khar nghal a ni.

A hmuna tlawhtu Joint Inspection Team hian a hmun laitu Lalhruaisanga, Chawntlangpui, Lawngtlai District chu rang taka leimin chhunzawm thei laite tifi nghal turin an hriattir a, hna a thawh zawh veleh Aizawl DC\DDMA hnuai Quick Response Team kaihhruainain a hmunhma hi

tha taka khuh nghal tura ruahmanna siam a ni a, kawng kal tan a him tih a
chian hnuah chauh kawng hi hawn ni se, tih a ni.

<><><>

PM - MANN KI BAAT

Prime Minister Narendra Modi-a chuan vawiin chawhma dar
11 khian Akashvani kaltlangin mipuite hnena thu a sawina, Mann
Ki Baat programme a hmang leh dawn a. Mizo tawnga lehlinin a zui
ang.

Tun tum ami hi episode 111-na tur a ni a. Prime Minister term
thumna atana a chelh leh hnua Mann Ki Baat hun a hman leh
hmasak ber tur a ni.

Akashvani leh Doordarshan, AIR News website leh newsonair
mobile app-ah te ngaihthlak theih a ni ang a. AIR News, DD News,
PMO leh Information and Broadcasting Ministry Youtube channel-
ah te livestream a ni ang.

<><><>

<><><>